



Izveštaj o radu SDA 2005-2009

Sarajevo, 26. maj 2009.

*Dame i gospodo,
Poštovani delegati i gosti Kongresa,*

Od Četvrtog kongresa SDA ima pune 4 godine i u BiH su se dogodile značajne promjene. Ovo je prilika da se osvrnem na protekli period i prezentiram najvažnije događaje i aktivnosti Stranke.

Danas smo mi **ne samo najjača politička stranka**, već i stranka sa najvišim rejtingom u Bosni i Hercegovini. Na SDA se danas kako na domaćoj, tako i međunarodnoj političkoj sceni, gleda kao na najozbiljniju, odgovornu i državotvornu političku stranku. **Od pokreta izrastamo u Stranku**, i to **modernu bh. i evropsku stranku** koji svi uvažavaju i cijene, uključujući dužnosnike i predstavnike međunarodne zajednice kako u BiH, tako Evropi i svijetu.

Svoje političko djelovanje SDA je ostvarivala preko stranačkih institucija – **Glavnog odbora, Predsjedništva, predsjednika Stranke, Nadzornog odbora i Suda časti**, ali i brojnih komisija, radnih tijela i Savjeta. Važnu ulogu i mjesto u radu Stranke imaju **Asocijacija mladih, Asocijacija FATMA i Asocijacija žena**. U protekle 4 godine održano je 17 sjednica GO, 46 sjednica Predsjedništva na kojima su, u skladu sa Statutom, donesene sve političke odluke. Umjesto neformalni sjela, zatvorenih sastanaka u narodu poznatih kao *minder politika*, odluke su donošene u institucijama Stranke, kroz otvorene i konstruktivne rasprave i visok stupanj konsenzusa.

Sud časti i Nadzorni odbor radili su u okviru svojih nadležnosti. Posebno su važni rad i aktivnosti Nadzornog odbora koji se brine za zakonitost rada, raspolaganju finansijskim sredstvima SDA sukladno važećim propisima, i to ne samo u Centrali, već nižim nivoima organizacije Stranke. Nadzorni odbor bio je posebno aktivan u slučajevima rješavanja pitanja izgradnje ili uknjižbe već izgrađenih i kupljenih prostora SDA.

Asocijacije Mladih, Žena i FATMA su svoje aktivnosti provodile i realizirale u skladu sa Statutom Stranke. Posebno želim istći djelovanje Asocijacije mladih SDA koja je primljena

u punopravno članstvo Evropske stranke mladih, osnivanje Političke akademije, uspješno organiziranje niza seminara i sličnih događaja.

Savjeti Stranke imali su važnu ulogu kod donošenja odluka kako stranačkih institucija, tako i osiguranja ekspertnih mišljenja i preporuka našim predstavnicima u izvršnoj i zakonodavnoj vlasti.

Dame i gospodo,

Period 2005-2009 obilježila su i dva izborna ciklusa, i to opći izbori 2006. i lokalni izbori 2008. godine. U oba ciklusa SDA je zadržala vodeću poziciju, iako je na izborima za člana Predsjedništva izabran moj protukandidat. 2008. godine SDA je na lokalnim izborima potvrdila poziciju ubjedljivo najjače političke stranke u BiH!

U kontekstu generalne političke scene, ovaj period se može podijeliti na dva dijela. Period 2004-2006 kada su provedene snažne **reforme**, uključujući i reformu u oblasti **poreskog, carinskog sigurnosnog i odbrambenog sistema**. Tada su ove nadležnosti i institucije prenesene sa entitetskog na nivo države. Na **moju inicijativu, Ustavni sud Bosne i Hercegovine je himnu i grb entiteta RS proglasio diskriminatorским i neustavnim obilježjima**. U tom periodu, 2006. godine bio je postignut i vrlo dobar sporazum o **prvoj fazi ustavne reforme** kojim bi država BiH bila jača i funkcionalnija, a išlo se u pravcu slabljenja entiteta. Nažalost, za usvajanje ovoga prijedloga nedostajala su 2 glasa. Time nije srušen samo paket amandmana na ustav, već je srušena i politika dogovora i kompromisa, politika korak po korak, ali stalno naprijed kakvu je vodio i zastupao i rahmetli predsjednik **Alija Izetbegović**.

Vrijeme je pokazalo da od politike **SVE ILI NIŠTA** ostaje **NIŠTA!** Danas, tri godine kasnije, ponovno se vraćamo na aprilski paket na šta jasno ukazuje posjeta potpredsjednika SAD **Džozefa Bajdena** i visokog predstavnika EU za vanjsku politiku i sigurnost **Haviera Solane**.

Za postizanje **sličnih rješenja** sada će biti **nužan daleko jači angažman američke administracije**. U svakom slučaju, izgubili smo najmanje četiri godine čime je nanijeta neprocjenjiva šteta državi Bosni i Hercegovini..

Bosna i Hercegovina i mi platili smo previsoku cijenu za potpisivanje Sporazuma o stabilizaciji i pridruživanju jer se zbog toga **odustalo od stvarne reforme policije**. Gotovo sve stranke, osim SDA, pristale su na legalizaciju postojećih loših rješenja. Vrijeme i događaji nakon toga svakodnevno jasno pokazuju da je napravljena nesaglediva šteta jer nemamo jedinstven, profesionalan sistem izvan dometa političkog uticaja. Sa takvim sistemom nije moguće osigurati efikasnu borbu protiv organiziranog i ostalih oblika kriminala.

Nakon ubjedljive pobjede na lokalnim izborima smatrali smo obavezom da, nakon više od 2 godine nacionalističke retorike, stagnacije BiH i destrukcije njenih institucija, ponovno pokrenemo procese **dogovora i političkog dijaloga**. **Rezultat toga je Prudski**

proces u kojem **BiH nije ništa izgubila, ali jeste dobila!** Iz Prudskog procesa proisteklo je rješavanje pitanja **pravnog statusa Distrikta Brčko** koje je za *Dejton* bilo **previše teško i delikatno**, a sada je riješeno na najbolji mogući način! Zahvaljujući dogovoru i kompromisu, definitivno je i voljom političkih predstavnika RS ustavno definirano da je Distrikt Brčko jedinica lokalne samouprave dio ustavnog sistema BiH i pod njenim suverenitetom.

Unatoč svim kritikama, moramo biti svjesni da dijaloga, dogovora i kompromisa mora biti ako želimo bolju budućnost za Bosnu i Hercegovinu i našu djecu! Tako je poručio i potpredsjednik SAD **Džozef Bajden** koji je time **odao priznanje ne samo predsjedniku, već cijeloj Stranci demokratske akcije.**

Dame i gospodo,

Pripreme za organizaciju 5. kongresa, demokratska rasprava i izbori sa više kandidata od općinskih organizacija do vrha Stranke pokazale su demokratske karakteristike današnje SDA.

Ipak smo uočili i određene nedostatke u radu Stranke koje ćemo morati otkloniti. Provest ćemo široku raspravu tokom prve godine predstojećeg mandata i izvršiti neophodne statutarne i organizacijske promjene. Sve sa ciljem da SDA bude još više demokratska, bolje organizirana, da djeluje efikasnije u ostvarivanju svojih ciljeva.

Hvala.